

合江縣志卷二十

屯田志

西蜀屯田之制自漢趙充國分屯松州諸葛武侯屯田渭水始宋高宗紹興七年以川陝宣撫吳玠治廢堰營田六十莊計田八百五十四頃歲收一十五萬石以助軍儲詔獎諭焉元至元二年命四川行院分官屯田十一年置西蜀四川屯田經畧司遣瀘州屯田軍四千轉漕重慶明時瀘州帶徵建武瀘衛兩處屯糧瀘衛屯糧共一萬二十八石

五升八合萬歷二年平定都夷割瀘衛中前二所全伍官軍移戍建武所遺軍田卽以原佃軍田之戶耕種承糧謂之衛田時永甯衛屬貴州其附近永甯之糧戶現充兵丁應納錢糧者州縣多於兵餉中扣抵國變後盡爲民田而戶口凋於兵燹小民有田有糧者又以差役爲苦州縣每有關緝逃糧之案於是奸民遂多以前朝軍田報糧永甯幸免差役如合江之遙壩二里壩等處多與永甯犬牙互錯或有田無山或有山無田零星夾插率由

於此關緝逃糧之案則以滇逆告變而止我朝順治年間議興川省屯田牛隻籽種仰給於秦卮離幸獲生全康熙六年四川總督苗澄酌議於重慶等鎮共抽兵七千名開墾將秋收所得屯米四萬二千石卽支來歲秋冬兵食旋因兵不習耕恐致兵農兩誤議爲銷兵省餉之謀則此事原未舉行而合江亦現在無屯田之制故畧述梗概如此